

MINISTARSTVO ZA OBRAZOVANJE, NAUKU, KULTURU I SPORT**174.**

Na osnovu člana 52. stav (9) i člana 117. stav (2), tačka p) Zakona o osnovnoj školi („Službene novine Zeničko-dobojskog kantona“, broj: 3/18), Ministarstvo za obrazovanje, nauku, kulturu i sport Zeničko-dobojskog kantona donosi:

**Pravilnik
o izboru učenika generacije u osnovnoj školi**

**Član 1.
(Predmet pravilnika)**

Ovim Pravilnikom utvrđuju se opći uvjeti za izbor učenika generacije u osnovnoj školi, način bodovanja, imenovanje komisije za izbor učenika generacije, postupak izbora učenika generacije, žalbeni postupak i proglašenje učenika generacije završnih razreda osnovnih škola na području Zeničko-dobojskog kantona.

**Član 2.
(Upotreba rođnoosjetljivog jezika)**

Gramatički izrazi upotrijebljeni u ovom Pravilniku za označavanje muškog ili ženskog roda podrazumijevaju oba roda.

**Član 3.
(Značenje pojedinih izraza)**

Pojmovi koji se koriste u ovom Pravilniku, imaju sljedeće značenje:

- a) Učenik je subjekt u odgojno-obrazovnom procesu u svim njegovim etapama od planiranja, preko realizacije, do vrednovanja.
- b) Učenik generacije može biti učenik koji je tokom školovanja imao primjerno vladanje i odličan uspjeh u učenju, kao i zapažene rezultate na takmičenjima planiranim godišnjim programom rada škole u organizaciji Ministarstva za obrazovanje, nauku, kulturu i sport, Pedagoškog zavoda i stručnih asocijacija i međunarodnih organizacija.
- c) Osnovna škola je škola koju učenik pohađa kao prvu školu.
- d) Bodovanje označava numeričke podatke koji se pripisuju učeniku za pojedine parametre iz uvjeta za izbor učenika generacije.
- e) Preliminarna lista je uvodna, početna lista koja kao takva može a ne mora pretrprijeti neke promjene.
- f) Nastavničko vijeće je stručni organ u osnovnoj školi, a sačinjavaju ga svi nastavnici i stručni saradnici, a nastavničkim vijećem rukovodi direktor osnovne škole.
- g) Razrednik je stručni voditelj odjeljenja.

**Član 4.
(Opći uvjeti za izbor učenika generacije)**

(1) Osnovna škola svake školske godine, među učenicima završnih razreda, bira i proglašava učenika generacije.

(2) Opći uvjeti za izbor učenika generacije su:

- a) da je tokom školovanja imao primjerno vladanje,
- b) da je tokom školovanja imao odličan uspjeh u učenju u svim razredima (minimalni prosjek općeg uspjeha tokom školovanja 4,90).

Član 5.
(Posebni uvjeti za izbor učenika generacije)

Ukoliko učenik ispunjava uvjete iz člana 4. stav (2) ovog Pravilnika u daljem postupku izbora učenika generacije u obzir se uzima ostvareni plasman tokom školovanja na takmičenjima planiranim godišnjim programom rada škole u organizaciji Ministarstva za obrazovanje, nauku, kulturu i sport, Pedagoškog zavoda, stručnih asocijacija i međunarodnih organizacija.

Član 6.
(Način bodovanja)

Opći uvjeti iz člana 4. i posebni uvjeti iz člana 5. ovog Pravilnika budu se na sljedeći način:

- Opći uspjeh u osnovnoj školi (od II do IX razreda) zaokružiti na dvije decimale na nivou svakog razreda, sabrati i pomnožiti brojem 20.
- Plasman na takmičenjima i broj ostvarenih bodova u skladu s distribucijom bodova iz tabele:

Nivo takmičenja	Broj bodova		
	I mjesto	II mjesto	III mjesto
Školsko takmičenje	4	2	1
Općinsko/gradsko takmičenje	6	5	4
Kantonalno takmičenje	12	10	8
Federalno takmičenje	18	15	12
Državno takmičenje	25	22	20
Međunarodno takmičenje	35	32	30

- Broj bodova po osnovu plasmana na svim takmičenjima (prvo, drugo i treće mjesto) se sabira na osnovu priložene dokumentacije (diploma, uvjerenja i sl.)
- Na takmičenjima tehničkog stvaralaštva i sportskim takmičenjima na nivou jedne školske godine boduje se samo jedna diploma, ona koja nosi više bodova.
- Ako se održava samo ekipno takmičenje učeniku (kandidatu za učenika generacije) koji je bio član ekipe pripada 30% bodova predviđenih za pojedinačni plasman.
- Ako se na ekipnom takmičenju dodjeljuje diploma i ekipi i pojedincu tada se kandidatu za učenika generacije boduje diploma koja nosi više bodova.

Član 7.
(Komisija za izbor učenika generacije)

- Provodenje postupka za izbor učenika generacije vrši Komisija za izbor učenika generacije (u daljem tekstu: Komisija).
- Komisiju od pet članova imenuje direktor škole na mandat od jedne školske godine.

Član 8.
(Postupak izbora učenika generacije)

- (1) Razrednici i pedagog škole na početku školske godine upoznaju učenike završnih razreda s načinom izbora učenika generacije.
- (2) Tokom mjeseca aprila razrednici i pedagog škole obavještavaju učenike (kandidate za učenika generacije) da potrebnu dokumentaciju, koja dokazuje ostvareni plasman na takmičenjima tokom školovanja, blagovremeno dostave Komisiji.
- (3) Direktor škole i Komisija utvrđuju krajnji rok za dostavu dokumentacije o čemu se obavijest postavlja na oglasnu tablu škole najkasnije petnaest dana prije krajnjeg roka za dostavu.
- (4) Članovi Komisije vrše bodovanje kandidata za učenika generacije u skladu s odredbama člana 4., člana 5. i člana 6. ovog Pravilnika neposrednim uvidom u pedagošku dokumentaciju i diplome/uvjerenja koja je dostavio učenik, o čemu sačinjavaju zapisnik.
- (5) U slučaju da dva ili više učenika ostvare isti broj bodova, učenikom generacije se proglašava učenik koji je ostvario veći broj bodova po osnovu općeg uspjeha zaokruženog na dvije decimale.

Član 9.
(Postupak izbora učenika generacije po dodatnom kriteriju)

U slučaju da dva ili više učenika imaju isti broj bodova nakon postupanja u skladu s članom 8. ovog Pravilnika, u daljem postupku izbora učenika generacije se boduje po 0,5 boda po školskoj godini, na osnovu uvida u pedagošku dokumentaciju, sljedeće:

- a) učešće u kulturno-javnim manifestacijama škole,
- b) predsjednik odjeljenja ili predsjednik vijeća učenika.

Član 10.
(Preliminarna lista)

Na temelju ostvarenih bodova prema odredbama ovog Pravilnika Komisija utvrđuje preliminarnu rang listu kandidata za učenika generacije i obavještava kandidate za učenika generacije o postavljanju preliminarne rang liste na oglasnu tablu škole.

Član 11.
(Prigovor na preliminarnu rang listu)

- (1) Ukoliko roditelj/učenik smatra da preliminarna rang lista nije pravilno utvrđena može uložiti prigovor na preliminarnu rang listu Komisiji u roku od sedam dana od dana postavljanja iste na oglasnu tablu škole.
- (2) Komisija razmatra pristigle prigovore, odlučuje po prigovoru i u roku od tri dana utvrđuje konačnu rang listu kandidata za učenika generacije.

Član 12.
(Izbor učenika generacije)

- (1) Predsjednik Komisije upoznaje Nastavničko vijeće o rezultatima postupka izbora učenika generacije.
- (2) Nastavničko vijeće razmatra prijedlog Komisije i donosi odluku o izboru učenika generacije.

(3) Odluka o izboru učenika generacije postavlja se na oglasnu tablu škole isti dan kada je Nastavničko vijeće donijelo odluku, a najkasnije naredni dan.

(4) U školi može biti izabran samo jedan učenik generacije.

Član 13.
(Žalbeni postupak)

- (1) Roditelj/učenik može na Odluku Nastavničkog vijeća o izboru učenika generacije uložiti žalbu Školskom odboru u roku od tri dana od dana postavljanja odluke na oglasnu tablu škole.
- (2) Školski odbor je dužan donijeti odluku po žalbi u roku od sedam dana od dana podnošenja žalbe.
- (3) Odluka Školskog odbora je konačna.

Član 14.
(Proglašenje učenika generacije)

- (1) Učenik generacije proglašava se javno na školskoj svečanosti.
- (2) Učeniku generacije dodjeljuje se diploma na obrascu koji je sastavni dio Pravilnika o sadržaju i načinu vođenja dokumentacije i evidencije u osnovnoj školi.
- (3) Promocija učenika generacije može se organizovati na nivou općine/grada i Kantona.

Član 15.
(Stupanje na snagu)

- (1) Stupanjem na snagu ovog Pravilnika prestaje da važi Pravilnik o izboru učenika generacije u osnovnoj školi („Službene novine Zeničko-dobojskog kantona“, broj: 5/06).
- (2) Ovaj Pravilnik stupa na snagu osmog dana od dana objave u „Službenim novinama Zeničko-dobojskog kantona“, a primjenjuje od školske 2021/2022. godine.

Broj: 10-34-3599-1-03/21
Datum, 31.03.2021. godine
Zenica

MINISTAR

Prof. dr. Spahija Kozlić, s.r.